

RELATION  
VERITABLE

De la mort barbare & cruelle du  
Roy d'Angleterre.

*Arrivée à Londres le huitiesme Fevrier  
mil six cens quarente-neuf.*



A P A R I S,

Chez FRANÇOIS PREVVERAY, grande  
ruë de la Bretonnerie, proche la porte  
Saint Iacques.

---

M. DC. XLIX. -

CASE

F

39

326

164928L

THE NEWBERRY  
LIBRARY





*RELATION VERITABLE*  
*de la mort barbare & cruelle du*  
*Roy d'Angleterre.*



Ors que le Parlement se fust rendu victorieux de toutes les armées du Roy d'Angleterre, ce Prince se trauestit & se retira vers les Escossois, qui au lieu de le secourir, le vendirent pour deux cent mille iacobus aux Anglois. Cependant le Parlement commande à Fairfax leur General, & à Crommwel son Lieutenant de desarmer, à quoy ils ne voulurent pas obeir, mais se saisissant de la persône du Roy qu'ils auoient en leur garde, firent esperer à vn chacun de le restablir, & donnerent liberté de conscience à toutes sortes de Sectes, & mesme aux Catholiques, pour fortifier leur party. En suite ils font aduancer leurs troupes vers Londres dont ils se rendent maistres, bannissent & emprisonnent plusieurs restes du Parlement, qui professoient la religion de Geneue, & remplit leurs places de gens choisis à sa poste, sans foy & sans conscience. Il fait tousiours semblant de vouloir restablir le Roy, mais luy fait entendre qu'il faut premierement destruire le party Calviniste; Et que pour le mettre hors de danger luy & les siens (parce que le Roy estant vne fois restably ils seroient



sujets aux Loix ) il falloit qu'il aduoüast estre coupable de tout le sang qui auoit esté respandu, & l'auteur de la guerre passée. Le Roy qui ne penetrait pas dans leur malice, ou bien qui estoit en vn estat de ne rien refuser, luy signe cét adueu. Les Escossois voyant leur party destruit, arment pour le remettre, sous pretexte de venger le Roy, dont Fairfax s'estoit saisi, & que les Anglois ne reestablissoient pas, côme ils leur auoient promis; ils sont desfaits par Fairfax, avec plusieurs autres partis qui se formerent contre luy en Angleterre. Ces expeditions acheuées, il marche vers Londres, emprisonne deux cens testes du Parlement, qu'il accuse d'auoir trempé dans la conspiration d'Ecosse, & bien loing de reestablir le Roy, il le fait conduire à Londres, pour luy donner la mort par vne pure cruauté & barbarie, puis que le Roy a plusieurs enfans, & que par sa mort, ils ont perdu vn bon prisonnier, attiré sur eux la haine de Dieu & des hommes, & avec tout cela ne se sont point deffaits de leur Roy, puisque le Prince de Galles l'est deuenü par la mort de son Pere, & qu'il est en estat de se venger d'eux, sans crainte que le Roy son Pere en soit maltraitté. Mais venons à la description de cette action barbare, dont nous n'auons point d'exemple dans l'antiquité, & que les siecles à venir auront peine de croire.

Il y eust Samedy quinze jours, le sixiesme de Fevrier, qu'ils menerent le Roy deuant vn Iuge subalterne, qui s'appelle *Kingsbinch*, qui luy demanda d'abord, s'il n'estoit pas coupable de tout le sang qui auoit



5  
auoit esté respandu depuis sept à huit ans en Angleterre, comme auteur de leur guerre (vous vous souuiendrez que j'ay marqué auparauant, que Fairfax luy fit signer cét adueu, dans l'esperance qu'il luy donnoit de le restablir.) Le Roy demande au Iuge, qu'elle autorité il auoit de l'interroger; & dit quil croyoit ne deuoir rendre compte de ses actions qu'à Dieu seul. Le Iuge luy repliqua qu'il n'estoit pas en des termes de parler de la sorte, & que cela ne le saueroit pas. Le Roy demanda en suite de parler au Parlement, ce qui luy fut refusé. Le Iuge l'ayant pressé derechef de respondre à l'accusation, le Roy en qui la longueur d'une prison n'auoit pas osté ny le cœur Royal, ny la Majesté, luy respondit qu'il estoit dès long-temps resolu à la mort, & que toutes ces formalitez n'y estoient pas necessaires, & se railla encore de son autorité & de son insolence, surquoy le Iuge donna la Sentence de mort, en ces termes, *Charles Stuart cy-deuant Roy d'Angleterre est condamné à la mort, pour auoir esté auteur de nostre guerre, & coupable du sang qui a esté respandu.* Le Roy fut remené dans sa prison, où il demanda à voir deux de ses enfans, qui sont à Londres, le Duc de Gloucester, & la Princesse Elizabeth; ce qui luy fut accordé, & luy laisserent le Dimanche & le Lundy, pour sauouer à longs traits toute l'horreur & l'amertume de la mort. Mais ce bon Prince y estoit disposé de longue main, & les incommoditez de la prison la luy auoient rendu sans doute tres-agreable, on luy accorda aussi de voir l'Euesque de Londres, personnage de doctrine & de probité dans sa Religion, il



6

vit encore ses deux enfans le Dimanche & le Lundy, qui estoient le plus grand sujet de sa douleur. Le Mardy 9. de Feurier iour destiné à ce meurtre execrable, l'on dressa vn eschaffaut deuant le Palais du Roy, où l'on attacha quatre gros anneaux de fer ou de cuiure, l'eschaffaut fut couuert d'vn drap noir; & le matin on enuoya au Roy vn habit de satin noir, & vne robe de Chambre de mesme estoffe.

J'auois oublié à vous dire que les Ambassadeurs des Princes Estrangers, espouuantez de cette nouuelle, furent tous demander audience au Parlement, pour tascher de détourner ce detestable attentat, mais elle leur fut refusée, & nostre Ambassadeur sur tout fit tous ses efforts pour leur parler, mais il ne luy fut iamais possible. Ces Messieurs firent dire aux Ambassadeurs qu'ils les prioient de les excuser, pour vn iour ou deux, & qu'ils auoient des affaires de grande importance à demeller.

La plume me tombe des mains, & il semble que ie ne sçaurois venir à la Catastrophe de cette sanglante tragedie, tant l'horreur me saisit & me possede. Le Roy, le meilleur Roy du monde, est traîné comme vn agneau à la boucherie, & liuré à ces ames barbares pour assouuir leur rage & leur fureur; on le mene de sa prison, à la place destinée pour cet acte execrable, il y marche sans contrainte, & la mort ne sçauroit effacer de son visage sacré, l'Image viuante de Dieu, pour y marquer la sienne. Estant arriué à l'eschaffaut, il demanda à parler au Parlement, disant qu'il auoit quelque secret de consequence à leur reueler, mais cela luy fut refusé, & on luy ordon-



na de monter sur l'eschaffaut, où il parut d'abord trois bourreaux masquez. Vous sçavez que les bourreaux ordinaires, quoy qu'accoustumez au carnage, eurent horreur de faire vne execution si espouuantable, & s'enfuirent; & l'on tient que *Fairfax*, *Crommwell* & le Milord *Say*, (soit qu'ils se défiassent de toute autre personne, ou qu'ils voulussent eux-mesmes auoir ce detestable contentement, de tremper leurs mains sacrileges dans ce sang Royal, ils se trauestirent & se masquerent pour seruir de bourreaux. Le Roy estoit tousiours accompagné de l'Euesque de Londres qui n'estoit pas en habit décent, mais comme vn Seculier. L'on voulut attacher le Roy à ces anneaux de fer, mais il dit qu'il n'en estoit pas besoin, qu'il mourroit sans peine & sans resistance. Toute la place estoit pleine des soldats de *Fairfax* & de *Crommwell*, & les fenestres des enuironns toutes remplies de monde, cōme aussi des eschaffauts qu'on auoit dressez tout à l'entour. Le Roy voulant entamer vn discours aux assistans, les bourreaux l'en empescherent & luy dirent qu'il se disposast promptement au coup de la mort. Il se contenta de leur dire, *Tenez traistres & rebelles, assou- nissez-vous de mon sang, & contraignez le Ciel par ce dernier crime à vous punir de tous les autres.* Ils luy voulurent couper les cheueux, mais il tira vne coëffe de nuict, qu'il auoit mise exprés dans sa pochette, tant il s'estoit apriuoisé avec la mort, & retroussa ses cheueux dessous, puis apres auoir fait ses prieres, & parlé quelque temps à l'Euesque de Londres, il s'agenouïlla, & mit le col sur vn billot haut de demy pied, &



l'un de ses bourreaux, laissa tomber vne hache bien affilée, qui entra iusques dans le bois. Ce coup execrable ne fut pas si-tost donné, que les soldats mirent l'espée à la main & crierent *Liberté, liberté*, l'un des bourreaux, fichant la teste de cét infortuné Prince au bout d'une pertuisane, la monstra à ces infames & barbares spectateurs, en criant voila la teste du traistre, aussi-tost les bourreaux disparurent, & le lasche Peuple de Londres, qui ne l'a osé deliurer durant sa vie, donne des larmes & des regrets inutiles à son espouventable mort.

Fairfax fit publier le lendemain par toute l'Angleterre que ce n'estoit plus vn Royaume mais vne Republique.

Ne fremissez vous pas Chrestiens, à la veuë de ce sanglant spectacle; Et vous Princes, Monarques, Potentats, qui auez souffert la prison de ce Prince, si honteuse à vos dignitez independantes, ne ferez vous pas vne paix generale, pour venger la mort de ce Roy, vous y estes obligez par honneur & par interest, & serez countables deuant Dieu, d'une partie de ce crime, pour ne l'auoir pas détourné, si vous n'en tesmoignez des ressentimens de colere & de vengeance. Et toy Ocean qui enuironne cét Isle malheureuse, que ne vomis-tu les eaux de tes abysses pour la submerger; Dieu, laschez luy la bride, & rompez les limites que vous luy auez prescrites de ce costé-là: Et que tous les Elemens conspirant à la destruction de ces barbares, si les hommes & les Princes n'y veulent pas trauailler.

